

ASEAN zon bebas nuclear
Utusan Online
November 20, 2011
By Hassan Mohd. Noor

NUSA DUA, BALI 19 Nov. - Sidang Kemuncak Asia Timur (EAS) Ke-6 hari ini membuat perakuan supaya menjadikan Asia Tenggara sebagai zon bebas nuklear, kata Datuk Seri Najib Tun Razak hari ini.

Perdana Menteri berkata, negara-negara Asia Tenggara tidak boleh dijadikan laluan untuk membawa masuk bahan-bahan yang akan digunakan bagi membuat senjata nuklear.

Menurut beliau, perakuan itu adalah antara beberapa perkara yang dibincangkan dalam mesyuarat EAS di samping kerjasama menangani bencana alam/malapetaka dan perubahan iklim.

Mesyuarat EAS melibatkan 10 negara anggota ASEAN serta rakan dialognya terdiri daripada Australia, China, India, Jepun, Korea Selatan, New Zealand, Rusia dan Amerika Syarikat.

Bercakap kepada wartawan Malaysia di sini petang ini, Perdana Menteri berkata, dalam isu maritim, mesyuarat mengambil ketetapan supaya menjadikan lautan di Asia Tenggara ini selamat dan bebas.

Dalam soal tuntutan bertindih, semuanya hendaklah diselesaikan secara rundingan dan pengakuan yang telah dibuat dari segi pelaksanaan Deklarasi Tatalaku yang diterima oleh semua negara termasuk China.

“Kebanyakan negara juga menyatakan pentingnya kita berpegang kepada undang-undang antarabangsa terutama UNCLOS (Konvensyen PBB Mengenai Undang-Undang Laut) dalam menyelesaikan tuntutan bertindih di kawasan ini,” katanya.

Penyelesaian pertikaian juga hendaklah melalui proses pelbagai hala yang melibatkan pihak-pihak berkepentingan sahaja.

Perdana Menteri juga menyifatkan penyertaan AS dan Rusia sebagai rakan dialog ASEAN merupakan satu pengiktirafan betapa pentingnya ASEAN sebagai satu bentuk badan kerjasama serantau.

Ditanya mengenai dua rakan dialog AS dan China, Perdana Menteri tidak menolak akan wujud sedikit sebanyak perbezaan pendapat antara AS sebagai kuasa militari dan China sebagai kuasa ekonomi di Asia.

“Tetapi secara prinsipnya masing-masing (AS dan China) mahukan peningkatan kerjasama di kawasan yang aman dan damai ini dan mahukan kemajuan ekonomi,” katanya.

Ditanya mengenai hasil Sidang Kemuncak ASEAN dan Sidang-Sidang Berkaitan yang berakhir hari ini, Perdana Menteri berpuas hati dengan perjalanan mesyuarat yang bermula Khamis lalu.

Katanya, dengan berbaki tiga tahun lagi, ASEAN harus terus berusaha untuk merealisasikan Komuniti ASEAN menjelang 2015.

“Ini selari dengan Deklarasi Bali Concord III mengenai Komuniti ASEAN Dalam Komuniti Global,” katanya sebelum berlepas pulang ke Malaysia malam ini.

Selain menghadiri mesyuarat Sidang Kemuncak ASEAN Ke-19, Perdana Menteri menyertai Sidang Kemuncak ASEAN-PBB Ke-4; Sidang Kemuncak ASEAN-India Ke-9; Sidang Kemuncak Asia Timur Ke-6 (sesi pleno) dan Sidang Kemuncak Asia Timur Ke-6 (sesi pemukiman).

Mengenai Sidang Kemuncak ASEAN-PBB, beliau berkata, sekretariat ASEAN disarankan supaya kerap menghubungi sekretariat di PBB bagi meningkatkan kerjasama bagi kepentingan negara-negara ASEAN.

“Malaysia juga memberi beberapa pandangan termasuk pentingnya menerima Pergerakan Kesederhanaan Global sebagai satu sistem nilai yang boleh didokong dan dihayati negara-negara ASEAN dan di peringkat global,” katanya.

Mengenai Palestin, Malaysia sekali lagi menyatakan sokongan kuat terhadap rakyat negara itu untuk mendapatkan sebuah negara yang merdeka dan berdaulat.

Berhubung Sidang Kemuncak ASEAN-India, Perdana Menteri berkata, terdapat potensi untuk memperkembangkan lagi kerjasama negara-negara anggota ASEAN dalam bidang perdagangan dengan India.

Justeru beberapa tindakan perlu diambil supaya Perjanjian Perkhidmatan dan Pelaburan di bawah kerangka Perjanjian Perdagangan Bebas (FTA) dapat dimuktamadkan awal tahun depan.

“India juga menjemput ASEAN menghadiri sambutan 20 tahun sebagai rakan dialog ASEAN yang akan diadakan pada Disember tahun depan,” katanya. – mingguan

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1120&pub=Utusan_Malaysia&sec=Dalam_Negeri&pg=dn_01.htm